



FOOD  
STANDARDS  
AGENCY

WALES

ASiantaeth  
Safonau  
Bwyd

CYMRU

---

# **Adroddiad ar Wasanaeth Gorfodi Cyfraith Fwyd**

Cyngor Ynys Môn

3 - 5 Mehefin 2003

## Rhagair

Mae archwiliadau o wasanaethau gorfodaeth cyfraith bwyd awdurdodau lleol yn rhan o drefniadau'r Asiantaeth Safonau Bwyd i wella diogelwch a hyder y defnyddiwr o ran bwyd. Mae'r trefniadau hyn yn cydnabod mai cyfrifoldeb awdurdodau lleol, yn bennaf, yw gorfodi cyfraith bwyd sy'n gysylltiedig â diogelwch, hylendid, cyfansoddiad a labelu bwyd, bwyd a fewnforiwyd a bwydydd anifeiliaid. Yn bennaf, caiff y swyddogaethau rheoleiddio hyn eu cynnig drwy eu Gwasanaethau Iechyd yr Amgylchedd a Safonau Masnach.

Mae'r adroddiad archwilio atodedig yn archwilio Gwasanaeth Gorfodi Cyfraith Fwyd yr awdurdod lleol. Mae'r asesiad yn cynnwys y trefniadau lleol a weithredir ar gyfer archwilio busnesau bwyd a bwydydd anifeiliaid, samplo a dadansoddi, rheolaeth fewnol, hyrwyddo hylendid bwyd a gweithgareddau addysgiadol. Dylid cydnabod y ceir cryn amrywiaeth yn y dull a'r modd y gall awdurdodau unedol gynnig eu gwasanaethau gorfodi bwyd, sy'n adlewyrchu anghenion a blaenoriaethau lleol.

Mae archwiliadau'r asiantaeth yn asesu cydymffurfiaeth awdurdodau lleol yn ôl Safon Gorfodi Cyfraith Fwyd, 'Y Safon', a gyhoeddwyd gan yr Asiantaeth yn rhan o Gytundeb Fframwaith ar Orfodaeth Cyfraith Fwyd Awdurdodau Lleol, ac sydd ar gael ar wefan yr Asiantaeth.

Prif nod y cynllun archwilio yw cynnal a gwella diogelwch a hyder defnyddwyr trwy sicrhau bod awdurdodau lleol yn cynnig gwasanaeth gorfodi cyfraith bwyd effeithiol. Mae'r cynllun hefyd yn rhoi'r cyfle i nodi a lledaenu arfer da a chynnig gwybodaeth i lywio polisi'r Asiantaeth ar ddiogelwch bwyd.

Hefyd, mae'r adroddiad yn cynnwys cynllun gweithredu, a baratowyd gan yr Awdurdod, i ymdrin â chanfyddiadau'r archwiliad.

I'ch cynorthwyo, gellir dod o hyd i restr o dermau technegol a ddefnyddir yn yr adroddiad archwilio yn Atodiad A.

## CYNNWYS

	Tud.	
<b>1</b>	<b>Cyflwyniad</b>	
	Rheswm am yr Archwiliad	4
	Cwmpas yr Archwiliad	4
	Cefndir	5
<b>2</b>	<b>Crynodeb Gweithredol</b>	<b>7</b>
	<b>Canfyddiadau'r Archwiliad</b>	
3	Trefnu a Rheoli	8
4	Adolygu a Diweddarau Polisiâu a Gweithdrefnau a Ddogfennwyd	10
5	Swyddogion Awdurdodedig	11
6	Cyfleusterau ac Offer	13
7	Archwilio Safleoedd Bwyd a Bwydydd Anifeiliaid	14
8	Cwynion am Fwyd, Bwydydd Anifeiliaid a Safleoedd Bwyd	18
9	Egwyddor yr Awdurdod Cartref	19
10	Cyngor i Fusnesau	20
11	Cronfa Ddata Safleoedd Bwyd a Bwydydd Anifeiliaid	21
12	Arolygu a Samplo Bwyd a Bwydydd Anifeiliaid	22
13	Rheoli ac Ymchwilio i Achosion a Chlefydau Heintus sy'n Ymwneud â Bwyd	24
14	Digwyddiadau Diogelwch Bwyd	25
15	Gorfodaeth	26
16	Cofnodion ac Adroddiadau Arolygu	27
17	Cwynion am y Gwasanaeth	29
18	Cydweithio â Sefydliadau Eraill	30
19	Monitro Mewnol	31
20	Adolygiad gan Drydydd Parti neu Gydradd	32
21	Hyrwyddo Diogelwch a Safonau Bwyd a Bwydydd Anifeiliaid	33
	<b>Atodiad</b>	
A.	Geirfa	
	<b>Cynllun Gweithredu ar gyfer Cyngor Sir Ynys Môn</b>	

## **1. Cyflwyniad**

- 1.1 Mae'r adroddiad hwn yn cofnodi canlyniadau'r archwiliad o dan benawdau Safon Gorfodi Cyfraith Fwyd yr Asiantaeth Safonau Bwyd, ac mae ar gael i'r cyhoedd ar wefan yr Asiantaeth. Mae copïau caled ar gael o Lyfrgell yr Asiantaeth Safonau Bwyd yn Aviation House, 125 Kingsway, Llundain WC2B 6NH, Ffôn: 020 7276 8181. Mae'r rhain yn destun i ffi o £7.50 ar gyfer eu hatgynhyrchu a'u dosbarthu, yn ogystal â £1.50 ar gyfer eu postio a'u pecynnu.

### ***Rheswm am yr Archwiliad***

- 1.2 Rhoddodd Deddf Safonau Bwyd 1999 y pŵer i'r Asiantaeth Safonau Bwyd osod safonau a monitro ac archwilio gwasanaethau gorfodi cyfraith bwyd awdurdodau lleol. Cynhaliwyd archwiliad y gwasanaeth bwyd yng Nghyngor Sir Ynys Môn o dan adran 12(4) y Ddeddf, yn rhan o raglen archwilio flynyddol yr Asiantaeth Safonau Bwyd.
- 1.2 1.3 Archwiliwyd yr Awdurdod fel rhan o raglen o archwiliadau llawn Asiantaeth Safonau Bwyd Cymru o bob un o'r 22 o awdurdodau lleol yng Nghymru.

### ***Cwmpas yr Archwiliad***

- 1.4 Cwmpas yr archwiliad oedd gwasanaeth gorfodi hylendid bwyd, safonau bwyd a chyfraith bwydydd anifeiliaid Cyngor Sir Ynys Môn. Cynhaliwyd elfen ar-y-safle'r archwiliad yn swyddfa'r Cyngor yn Llangefni, Ynys Môn, ar 3 – 5 Mehefin 2003.
- 1.5 Aseswyd cydymffurfiaeth y Cyngor yn erbyn Y Safon gan yr archwiliad, gan ddefnyddio protocolau archwilio ASB/AP3/1 - ASB/AP21/1. Mabwysiadwyd Y Safon gan Fwrdd yr Asiantaeth Safonau Bwyd ar 21 Medi 2000 ac mae'n ffurfio rhan o Gytundeb Fframwaith yr Asiantaeth ag awdurdodau lleol. Gellir dod o hyd i'r Cytundeb Fframwaith a'r protocolau archwilio ar wefan yr Asiantaeth.

## **Cefndir**

- 1.6 Lleolir yr Awdurdod yng ngogledd-orllewin Cymru ar Ynys Môn, ac mae'n cynnwys ardal o 71,511 hectar. Mae ganddo 201 cilomedr o arfordir, y mae natur wledig i'r rhan fwyaf ohono. Ynghyd ag amaethyddiaeth, twristiaeth yw prif ddiwydiant yr ynys. 65,400 yw poblogaeth Ynys Môn, yr amcangyfrifir ei bod yn dyblu yn ystod tymor y gwyliau oherwydd ymwelwyr dydd ac arosiadau tymor hwy. Mae porthladd Caergybi yng ngogledd yr Ynys yn cynnig cysylltiad pwysig ag Iwerddon, ac mae'r glannau o amgylch yr ynys yn gartref i nifer o welyau cregynbysgod masnachol.
- 1.7 Gorfodwyd y gyfraith fwyd gan swyddogion yn Adain Iechyd yr Amgylchedd ac Adain Safonau Masnach yr Adran Gwasanaethau Amgylcheddol, a leolir yn y Gyfarwyddiaeth Cynllunio a Gwasanaethau Amgylcheddol.
- 1.8 Roedd Swyddfeydd y Cyngor ar agor rhwng 08:45 – 17:00 o ddydd Llun i ddydd Gwener. Nid oedd gan yr Awdurdod wasanaeth ffurfiol y tu allan i oriau gwaith.
- 1.9 Yn ogystal â gorfodi cyfraith fwyd, roedd tîm Iechyd yr Amgylchedd a'r tîm Safonau Masnach hefyd yn gyfrifol am ddarparu ystod o wasanaethau, gan gynnwys iechyd a diogelwch galwedigaethol, llygredd, cartrefi sector preifat, iechyd porthladdoedd, diogelwch cynnyrch, mesureg, masnach deg, trwyddedu, marchnadoedd a ffeiriau a gwaith gorfodi iechyd anifeiliaid.
- 1.10 Caiff lefel staffio'r Tîm Gwasanaethau Amgylcheddol ar gyfer gorfodi cyfraith fwyd, a fanylir yng Nghynllun Gwasanaeth Bwyd yr Awdurdod 2003/2004, ei ddangos isod:

<b>Adnodd sydd ar gael</b>	<b>FTE*</b>
Swyddogion Gorfodi Hylendid Bwyd	3.0
Swyddogion Gorfodi Safonau Bwyd a Bwydydd Anifeiliaid	2.5
<b>CYFANSWM</b>	<b>5.5</b>

\*Cyfwerth ag Amser Llawn

- 1.11 Roedd y gwasanaeth gorfodi hylendid bwyd yn cynnwys 2 aelod o staff FTE a gynhaliai arolygiadau a swyddog samplo. Roedd Prif Swyddog yr adran diogelwch bwyd yn gyfrifol am reoli gorfodi iechyd a diogelwch a chyflawni swyddogaethau iechyd porthladdoedd, yn ogystal â gwaith gorfodi bwyd. Ni fanylwyd yr amser a ddyrennir i waith gorfodi hylendid bwyd yn y Cynllun Gwasanaeth Bwyd ac, felly, nid yw wedi'i gynnwys

yn y tabl uchod. Nododd yr Awdurdod ddiffyg yn ei adnoddau o ran 1 swyddog gorfodi hylendid bwyd, ac adeg yr archwiliad roedd wedi hysbysebu'r swydd ond heb benodi unrhyw un.

- 1.12 Amcangyfrifwyd mai costau ariannol y gwasanaeth hylendid bwyd ar gyfer 2003/2004 oedd £118,570. Roedd costau'r gwasanaeth safonau bwyd a bwydydd anifeiliaid wedi'u cynnwys yn y cyfanswm o £381,700 a roddir i'r gwasanaeth safonau masnach. Nid oedd yr Awdurdod yn gallu cynnig dadansoddiad manwl o feysydd unigol y gwasanaeth oddi mewn i'r cyfanswm hwn.
- 1.13 Nodai ffurflenni monitro'r Awdurdod, a gyflwynwyd i'r Asiantaeth ar gyfer pedwar chwarter blwyddyn ariannol 2001/2002, fod yr Adran Gwasanaethau Amgylcheddol yn gyfrifol am orfodi deddfwriaeth fwyd mewn 1210 o safleoedd. Effeithiodd yr achos o glwy'r traed a'r genau, a'i gwnaeth yn ofynnol ail-neilltuo adnoddau, yn wael ar y gweithgarwch arolygu a gynlluniwyd ar gyfer y cyfnod hwn. Yn bennaf, yn y sectorau arlwyo ac adwerthu oedd y busnesau bwyd a arolygwyd. Roedd y ffurflenni'n dangos bod yr Awdurdod wedi cynnal:

<b>Gweithgaredd gorfodi</b>	<b>Nifer</b>
Arolygiadau hylendid bwyd	446
Ymweliadau hylendid bwyd eraill	442
Arolygiadau safonau bwyd	41
Ymweliadau safonau bwyd eraill	44
Arolygiadau bwydydd anifeiliaid	0
Ymweliadau bwydydd anifeiliaid eraill	0
Samplau anffurfiol	2
Samplau ffurfiol	390

## **2. Crynodeb Gweithredol**

2.1 Roedd yr Awdurdod yn cynnal lefel o weithgarwch ar draws ystod y cyfrifoldebau yr oedd y gwasanaeth yn gysylltiedig â nhw. Fodd bynnag, golygai materion adnoddau na fu'r gwasanaeth, yn hanesyddol, mor weithgar ag y byddid yn ei ddisgwyl, yn enwedig o ran ei raglen arolygu safonau bwyd. Nodwyd nad oedd yr Awdurdod wedi cymryd unrhyw gamau gorfodi ffurfiol yn ystod y 2 flynedd cyn yr archwiliad.

Dylai'r gwaith a wnaed yn ddiweddar i weithredu ystod lawn gofynion y Safon, ynghyd â'r cynnydd arfaethedig mewn lefelau staffio, sicrhau bod yr Awdurdod yn cynnig gwasanaeth mwy cynhwysfawr ac effeithiol.

## **2.2 Maes Allweddol i'w Wella gan yr Awdurdod**

### ***Amllder Arolygu***

Nid oedd arolygiadau safonau bwyd yn cael eu cynnal yn unol â'r amllder sylfaenol sy'n ofynnol gan God Ymarfer Rhif 8 Deddf Diogelwch Bwyd: Arolygiadau Safonau Bwyd. Mae arolygiadau a gynhelir yn unol â'r amllder sylfaenol yn sicrhau y caiff risgiau sy'n gysylltiedig â gweithredu busnesau bwyd eu nodi mewn pryd.

## Canfyddiadau'r Archwiliad

### 3. Trefnu a Rheoli

- 3.1 Gweithredai'r Awdurdod lywodraeth leol ar sail 'arddull Cabinet', gydag Adran Weithredol a gynhwysai Arweinydd a Dirprwy Arweinydd ynghyd â 7 aelod arall, pob un â'i bortffolio ei hun. Gan yr aelod â'r portffolio am Gymunedau Iach a Diogel oedd y cyfrifoldeb am y rhan fwyaf o'r gwasanaeth gorfodi bwyd.
- 3.2 Roedd gan yr Awdurdod 5 Cyfarwyddiaeth, a chydgyfrifoldeb Adain Iechyd yr Amgylchedd ac Adain Safonau Masnach yr Adran Gwasanaethau Amgylcheddol, o fewn y Gyfarwyddiaeth Cynllunio a Gwasanaethau Amgylcheddol, oedd darparu'r gwasanaeth diogelwch bwyd.
- 3.3 Roedd y fframwaith cynllunio corfforaethol yn cynnwys Cynllun Perfformiad Gwerth Gorau (CPGG) ar gyfer 2002 -2003. Effeithiodd yr achos o glwy'r traed a'r genau yn ddifrifol ar yr amserlen ar gyfer adolygu gwasanaethau corfforaethol, ac fe'i gohiriwyd tan y cyflawnwyd 'dadansoddiad ar draws yr awdurdod cyfan'. Roedd gan yr Awdurdod 5 amcan Corfforaethol.
- Sicrhau ffyniant economaidd yr Ynys a chynnig cyfleoedd addysgiadol a hyfforddiant i bobl yr Ynys;
  - Cynnig gwasanaethau o'r ansawdd uchaf i fodloni dyheadau pobl yr Ynys;
  - Hyrwyddo ac amddiffyn amgylchedd cynaliadwy a diogel;
  - Hyrwyddo treftadaeth yr Ynys a'r iaith Gymraeg;
  - Hyrwyddo lles cymdeithasol cymunedau'r Ynys.
- 3.4 Cynhwysai'r CPGG wybodaeth am y gwasanaeth, manylion am berfformiad mewn blynyddoedd blaenorol, a nodai gamau allweddol a dangosyddion perfformiad ar gyfer y flwyddyn a oedd ar ddod. Y dangosydd perfformiad a ddefnyddiwyd ar gyfer diogelwch bwyd oedd: Canran yr arolygiadau o safleoedd bwyd y dylid fod wedi eu cynnal, ac a gynhaliwyd ar gyfer  
(a) safleoedd risg uchel, (nod 100%)  
(b) safleoedd eraill. (nod 90%)
- 3.5 Yn 2001/2002, adroddodd yr Awdurdod ei fod wedi cynnal 89.6% o'r arolygiadau uchel eu risg a 91.5% o'r arolygiadau o safleoedd eraill, tra

yn 2002/2003 adroddodd mai'r perfformiad gwirioneddol oedd 100% yn y ddau gategori.

- 3.6 Roedd yr Awdurdod wedi llunio Cynllun Gwasanaeth Bwyd drafft cynhwysfawr ar gyfer 2003/2004, a oedd yn unol â'r Arweiniad Cynllunio Gwasanaeth yn y Cytundeb Fframwaith ar Orfodi Cyfraith Fwyd yr Awdurdod Lleol. Cymeradwywyd y Cynllun Gwasanaeth yn llawn gan y fforwm Aelodau perthnasol ar 27 Mai 2003.
- 3.7 Adolygwyd CPGG 2002/2003 cyn yr archwiliad. Cynhaliwyd adolygiad o berfformiad Cynllun Gwasanaeth Bwyd 2002/2003, a gymeradwywyd gan aelodau ar 27 Mai 2003. Cynhwysai nodi amrywiadau o gynllun y flwyddyn flaenorol, ac amlygai feysydd o'r gwasanaeth yr oedd yn ofynnol eu gwella ar gyfer y flwyddyn nesaf.

#### **4 Adolygu a Diweddarau Polisiâu a Gweithdrefnau a Ddogfennwyd**

- 4.1 Roedd yr Awdurdod wedi llunio nifer o weithdrefnau dogfenedig ar gyfer llawer o feysydd o ran ei weithgarwch gorfodi cyfraith fwyd. Yn ddiweddar, lluniodd weithdrefn rheoli dogfennau i gynnwys dogfennau sy'n gysylltiedig â gorfodi hylendid bwyd. Cynhwysid adolygiad blynyddol o ddogfennaeth berthnasol yn rhan o'r weithdrefn rheoli dogfennau. Fodd bynnag, nid oedd y weithdrefn yn cynnwys gorfodi safonau bwyd neu fwydydd anifeiliaid.
- 4.2 Roedd gan staff fynediad at wyddoniaduron electronig diweddaredig ar gyfraith fwyd fasnachol a chopïau caled o'r holl ddogfennaeth angenrheidiol ar gyfer cynnal gweithgareddau gorfodi, gan gynnwys deddfwriaeth ac arweiniad priodol. Roedd nifer fach o gopiâu caled o arweiniad cymeradwy a ddisodlwyd gan rai diweddarach yn bresennol yn adnodd llyfrgell yr adran.

#### *Argymhellion*

- 4.3 Dylai'r Awdurdod:
- (i) Ddatblygu a gweithredu'r system reoli ymhellach i sicrhau y caiff yr holl bolisiau a gweithdrefnau dogfenedig o ran gorfodi cyfraith fwyd eu hadolygu yn rheolaidd, a phryd bynnag y ceir newidiadau i ddeddfwriaeth neu arweiniad a gyhoeddir yn ganolog. [Y Safon - 4.1]
  - (ii) Sicrhau y caiff yr holl ddogfennaeth o ran ei weithgarwch gorfodi ei chynnwys yn y system reoli ac y caiff unrhyw newidiadau i'r ddogfennaeth eu hawdurdodi'n briodol, ac y gwaredir unrhyw ddogfennau a ddisodlwyd neu nodi'n glir eu bod wedi'u disodli.  
[Y Safon – 4.2]

## 5 **Swyddogion Awdurdodedig**

- 5.1 Roedd yr Awdurdod wedi penodi 2 swyddog arweiniol â'r wybodaeth arbenigol angenrheidiol; un i orfodi hylendid bwyd a'r ail i orfodi safonau bwyd a bwydydd anifeiliaid.
- 5.2 Roedd yr Awdurdod wedi cynhyrchu cynllun dirprwyo a awdurdodai swyddogion unigol i ddefnyddio pwerau penodol. Fodd bynnag, awdurdodwyd uwch reolwyr i gyflawni dyletswyddau gorfodi bwyd heb hyfforddiant diweddaru priodol a heb gynnal y profiad perthnasol. Yn ymarferol, roedd yr holl swyddogion yn cyflawni eu dyletswyddau yn unol â'u hyfforddiant, eu profiad a'u cymwysterau.
- 5.3 Nid yw'r Awdurdod yn gweithredu gwasanaeth ffurfiol y tu allan i oriau gwaith. Rhoddwyd gwybod i'r archwilwyr, petai materion difrifol o ran gorfodi bwyd yn codi y tu allan i oriau gwaith arferol, y byddid yn cysylltu â swyddog ag awdurdod addas ar y cyfle cyntaf, er bod y trefniant hwn yn dibynnu ar 'ewyllys da'.
- 5.4 Roedd gan yr Adran statws Buddsoddwyr Mewn Pobl, a gweithredid cynllun arfarnu ac adolygiad blynyddol o ddatblygiad staff. Cynhyrchwyd cynllun gweithredu yn rhan o arfarniad pob aelod o staff a fanylai anghenion hyfforddiant swyddogion unigol. Tynnwyd y rhain ynghyd i gynhyrchu rhaglen hyfforddiant flynyddol i'r gwasanaeth.
- 5.5 Roedd gan yr Awdurdod weithdrefn ddogfenedig ar gyfer awdurdodi swyddogion.
- 5.6 Nid oedd yr Awdurdod yn cynnal cofnod cyflawn o gymwysterau a hyfforddiant academaidd perthnasol swyddogion neu gymwysterau a hyfforddiant arall. Yn ogystal, lle'r oedd cofnodion am hyfforddiant ar gael, roedd angen eu hestyn i gynnwys manylion am gynnwys, amcanion a pharhad y cwrs, a'r modd yr asesid yr hyfforddiant.
- 5.7 Nid oedd dadansoddiad o'r gyllideb sydd ar gael ar gyfer darparu hyfforddiant o fewn y gwasanaeth gorfodi Bwyd ar gael adeg yr archwiliad. Fodd bynnag, roedd yn amlwg o nifer a pherthnasedd y cyrsiau a ddilynwyd bod yr Awdurdod wedi ymrwymo i roi hyfforddiant priodol i'w staff.

*Argymhellion*

5.8 Dylai'r Awdurdod:

- (i) Sicrhau bod gan yr holl staff a awdurdodwyd i gyflawni dyletswyddau gorfodi bwyd yr hyfforddiant priodol â'r profiad addas. [Y Safon - 5.3]
- (ii) Cofnodi cynnwys, amcanion, parhad ac unrhyw asesiad a wnaed o gyrsiau hyfforddi a fynychwyd gan staff gorfodi bwyd. [Y Safon - 5.4]
- (iii) Cofnodi cymwysterau academiaidd neu gymwysterau perthnasol eraill a hyfforddiant y staff gorfodi bwyd. [Y Safon - 5.5]

## 6 Cyfleusterau ac Offer

- 6.1 Roedd yr Awdurdod wedi peri bod yr holl offer a chyfleusterau sy'n angenrheidiol i ganiatáu cynnal yr holl weithgareddau sy'n gysylltiedig â'r gwasanaeth, ar gael.
- 6.2 Roedd gan yr Awdurdod weithdrefn ddogfenedig ar gyfer calibro'r thermomedrau a ddefnyddid gan swyddogion. Yn ogystal, cynhyrchwyd ffurflenni i gofnodi gwiriadau calibro'r thermomedrau a gwiriadau tymheredd ar offer rhewyddio a ddefnyddid i gadw eitemau bwyd sy'n cael eu hymchwilio. Fodd bynnag, nid oedd y weithdrefn yn cynnwys manylion am derfynau goddefiant derbyniol yr offer, amlder, y camau gwirio i'w cymryd pan fo'r canlyniadau y tu allan i'r terfyn goddefiant a gwiriadau rheolaidd a wnaed gan swyddogion rhwng gwiriadau calibro'r gweithgynhyrchwyr.
- 6.3 Roedd y feddalwedd gyfrifiadurol a weithredid gan yr Awdurdod yn gallu cynnig gwybodaeth ystadegol y gwnaed cais amdano gan Asiantaeth Safonau Bwyd. Roedd gan yr Awdurdod weithdrefn gorfforaethol i sicrhau y gweithredid systemau wrth gefn priodol i leihau'r risg o lygru neu golli gwybodaeth a gedwid ar y gronfa ddata.

### *Argymhelliaid*

#### 6.4 Dylai'r Awdurdod:

Adolygu a gweithredu'r weithdrefn ddogfenedig ar gyfer calibro i sicrhau y caiff yr holl offer mesur tymheredd eu calibro a'u gwirio yn gwbl unol â Chod Ymarfer Rhif 10 y Ddeddf Diogelwch Bwyd: Gorfodi Gofynion Rheoli Tymheredd y Rheoliadau Hylendid Bwyd. [Y Safon - 6.2]

## 7 Archwilio Safleoedd Bwyd a Bwydydd Anifeiliaid

### *Hylendid Bwyd*

- 7.1 Yn ei Gynllun Gweithredu ar gyfer 2003/2004, adroddodd yr Awdurdod am gyfanswm y safleoedd bwyd:

Categori Risg	Nifer	%*
A	0	0
B	52	6
C	484	56
D	129	15
E	157	18
F	40	5
Heb Radd	0	0
<b>CYFANSWM</b>	<b>862</b>	

\* Ffigurau wedi'u talgrynnu

- 7.2 Nododd yr Awdurdod fod 23 o safleoedd wedi'u trwyddedu o dan Reoliadau Diogelwch Bwyd (Hylendid Bwyd yn Gyffredinol) (Siopau Cigyddion) (Gwelliant) (Cymru) 2000, a chymeradwywyd 13 o safleoedd o dan ddeddfwriaeth benodol i gynnyrch (Safleoedd Cymeradwy).
- 7.3 Archwiliwyd hanes arolygiadau 10 safle cyffredinol a 6 Safle Cymeradwy. Mewn 4 achos, ni chynhaliwyd arolygiadau yn ôl yr amlder sylfaenol sy'n ofynnol gan God Ymarfer Rhif 9 y Ddeddf Diogelwch Bwyd: Arolygiadau Hylendid Bwyd. Hefyd, nododd gwiriad o'r cofnodion cyfrifiadurol bod yr Awdurdod yn hwyr yn arolygu 4 safle a oedd wedi cael eu harolygu yn y gorffennol a 25 o safleoedd newydd a oedd yn disgwyl am eu harolygiad cyntaf.
- 7.4 Cyflwynwyd gweithdrefn arolygu ddogfenedig gan yr Awdurdod, a oedd yn cynnwys safleoedd cyffredinol, ac a gyfeiriai ond rhyw ychydig at y safleoedd hynny a gymeradwywyd o dan reoliadau sy'n benodol i gynnyrch, er nad oedd yn cynnwys safleoedd cigyddion yr oedd yn ofynnol eu trwyddedu. Defnyddiwyd adroddiadau arolygu a ffurflenni arolygu safonedig i gofnodi canfyddiadau arolygiadau, ynghyd â manylion y busnesau dan sylw.
- 7.5 Cynhaliat swyddogion â chanddynt awdurdod priodol arolygiadau trylwyr ar safleoedd cyffredinol a chynnig graddau risg cywir, yn unol ag arweiniad swyddogol. Cymerwyd camau dilynol priodol ym mhob achos lle nodwyd diffyg cydymffurfio, gan gynnwys ailymweld o fewn y cyfnod priodol.

- 7.6 Anfonwyd adroddiadau at berchnogion ar ôl arolygu safleoedd cyffredinol. Roedd yr adroddiadau'n eglur a gwahaniaethid rhwng y gofynion cyfreithiol a'r argymhellion. Roedd y gwaith a oedd yn ofynnol ar ôl arolygiadau wedi'i nodi'n glir, yn cymryd Canllawiau Diwydiannol i ystyriaeth, ac yn gyson ag arweiniad a gyhoeddwyd yn ganolog. Fodd bynnag, mewn 5 o'r adroddiadau, dyfynnwyd cyfeiriadau deddfwriaethol anghywir neu anghyflawn.
- 7.7 Roedd hanes cyfyngedig o orfodaeth o ran yr holl Safleoedd Cymeradwy. Yn achos 5 o'r 6 ffeil Safle Cymeradwy a archwiliwyd, nid oedd dogfen gymeradwyo yn bresennol ac, yn achos yr 1 ddogfen gymeradwyo a oedd yn bresennol, nid oedd yn rhestru'r nwyddau a gymeradwywyd.
- 7.8 Archwiliwyd deg copi caled ynghylch safleoedd cigyddion yr oedd arnynt angen trwydded, a dangoswyd eu bod yn cynnwys manylion cynhwysfawr am weithrediad y busnes, gan gynnwys asesiadau swyddogion. Defnyddiwyd ffurflenni cais ac arolygu safonol, a phenderfynwyd yr holl geisiadau cyn pen 28 diwrnod.

### *Argymhellion*

- 7.9 Dylai'r Awdurdod:
- (i) Sicrhau y cynhelir arolygiadau hylendid bwyd yn ôl yr amllder sylfaenol sy'n ofynnol o dan God Ymarfer Rhif 9 y Ddeddf Diogelwch Bwyd: Arolygiadau Hylendid Bwyd. [Y Safon – 7.1]
  - (ii) Sicrhau y cynhelir y broses gymeradwyo a'r arolygiadau ar Safleoedd Cymeradwy yn gwbl unol â'r ddeddfwriaeth berthnasol a'r arweiniad swyddogol. Dylai hyn gynnwys adolygiad o gymeradwyaethau sy'n bodoli eisoes. [Y Safon – 7.2]
  - (iii) Adolygu'r weithdrefn arolygu ddogfenedig bresennol i gyfeirio'n fwy penodol at Safleoedd Cymeradwy ac i gynnwys arolygiadau trwyddedu cigyddion. [Y Safon – 7.5]

### Safonau Bwyd a Bwydydd Anifeiliaid

- 7.10 Yng Nghynllun Gwasanaeth 2003/2004, adroddodd yr Awdurdod bod 975 o safleoedd a oedd yn destun arolygiadau safonau bwyd a 170 o safleoedd a oedd yn destun arolygiadau bwydydd anifeiliaid.

#### Arolygiadau Safonau Bwyd

Categori Risg	Nifer	%*
Uchel	27	3
Canolig	356	37
Isel	592	60
<b>CYFANSWM</b> (Safleoedd a raddiwyd)	<b>975</b>	

\* Ffigurau wedi'u talgrynnu

#### Arolygiadau Bwydydd Anifeiliaid

Categori Risg	Nifer	%*
Uchel	5	3
Canolig	105	62
Isel	60	35
<b>CYFANSWM</b>	<b>170</b>	

\* Ffigurau wedi'u talgrynnu

- 7.11 Archwiliwyd hanes arolygiadau 10 safle safonau bwyd. Yn achos 8 ohonynt, cynhaliwyd arolygiadau yn ôl yr amllder sylfaenol sy'n ofynnol o dan God Ymarfer Rhif 8 y Ddeddf Diogelwch Bwyd: Arolygiadau Safonau Bwyd. Fodd bynnag, nodai gwiriad o'r cofnodion cyfrifiadurol fod yr Awdurdod yn hwyr gydag arolygu 431 o safleoedd.
- 7.12 Cyhoeddwyd adroddiadau arolygu yn achos pob un o'r 10 o ffeiliau am safleoedd a archwiliwyd. Roedd gwybodaeth am safleoedd lle nad oeddent yn gweithgynhyrchu yn gyfyngedig ac, yn gyffredinol, nid oedd digon o wybodaeth ar ffeil i asesu a oedd yr arolygiadau wedi'u cynnal yn unol â'r ddeddfwriaeth berthnasol, neu i weld a aseswyd cydymffuriad â safonau cyfreithiol rhagnodedig. Roedd gwybodaeth ffeil am safleoedd gweithgynhyrchu yn fwy cynhwysfawr.
- 7.13 Roedd gan yr Awdurdod weithdrefnau arolygu dogfenedig ar gyfer safonau bwyd a bwydydd anifeiliaid a oedd yn rhan o'u dogfennau gweithdrefnol ar gyfer gorfodi.

- 7.14 Archwiliwyd hanes arolygiadau 8 o safleoedd bwydydd anifeiliaid. Cofnodwyd dyddiadau'r arolygiad ar y gronfa ddata ond, fel arall, roedd y wybodaeth am y safle yn gyfyngedig, gan olygu ei fod yn anodd asesu a gynhaliwyd arolygiadau yn unol â'r ddeddfwriaeth berthnasol a safonau cyfreithiol rhagnodedig.

*Argymhelliad*

- 7.15 Dylai'r Awdurdod:

Sicrhau y cynhelir arolygiadau safonau bwyd yn ôl yr amllder sylfaenol sy'n ofynnol gan God Ymarfer Rhif 8 y Ddeddf Diogelwch Bwyd: Arolygiadau Safonau Bwyd.  
[Y Safon – 7.1]

- 8** Cwynion am Fwyd, Bwydydd Anifeiliaid a Safleoedd Bwyd
- 8.1 Roedd gan yr Awdurdod bolisiau a gweithdrefnau dogfenedig o ran cwynion am hylendid bwyd, safonau bwyd a bwydydd anifeiliaid. Roedd hyn yn cynnwys ffurflenni safonol i gofnodi'r gwyn, cyflwyno'r gwyn i'r dadansoddwr cyhoeddus neu'r archwiliwr bwyd a nifer o lythyrau safonol a ddefnyddid i ohebu â'r achwynydd, yr adwerthwr/gweithgynhyrchwr a'r awdurdod cartref/gwreiddiol.
- 8.2 Archwiliwyd cofnodion 10 o gwynion am hylendid bwyd a safleoedd bwyd. Dangosai ffeiliau y cofnodwyd data am y gwyn a oedd, yn gyffredinol, yn gyflawn ac y cynhaliwyd archwiliadau priodol. Mewn 4 ffeil, nid oedd tystiolaeth i ddangos y rhoddwyd gwybod i'r holl bartïon cysylltiedig am hynt y gwyn, fel sy'n ofynnol yn ôl gweithdrefn yr Awdurdod.
- 8.3 Archwiliwyd cofnodion 8 o gwynion am safonau bwyd. Dangosai ffeiliau y cofnodwyd data am y gwyn a oedd, yn gyffredinol, yn gyflawn ac y cynhaliwyd archwiliadau priodol. Fodd bynnag, mewn 2 achos, roedd y cofnodion yn berthnasol i faterion eraill heblaw cwynion, gan ddangos y nodwyd y math o weithgaredd yn amhriodol ar y gronfa ddata gyfrifiadurol.
- 8.4 Nid oedd yr Awdurdod wedi derbyn unrhyw gwynion am fwydydd anifeiliaid.

*Argymhelliaid*

- 8.5 Dylai'r Awdurdod:

Sicrhau y cymerir camau priodol o ran cwynion a dderbynnir, yn unol â'r arweiniad a gyhoeddir yn ganolog a gweithdrefnau'r Awdurdod ei hun. [Y Safon – 8.2]

## **9 Egwyddor yr Awdurdod Cartref**

- 9.1 Nodai Cynllun Gwasanaeth 2003/2004 fod yr Awdurdod yn cefnogi Egwyddor yr Awdurdod Cartref yn llawn. Dangosai'r cofnodion fod yr Awdurdod yn gweithredu fel Awdurdod Cartref ar faterion safonau bwyd i 10 busnes lleol, ac yn gweithredu yn anffurfiol i nifer o safleoedd mewn cysylltiad â hylendid bwyd. Nid oedd wedi diweddarau manylion am safle'r awdurdod cartref neu swyddogion cyswllt, a gedwid gan Gydlynwyr Gwasanaethau Rheoleiddio yr Awdurdodau Lleol (LACORS).
- 9.2 Roedd yr Awdurdod wedi cynhyrchu a gweithredu gweithdrefn o ran mabwysiadu cytundeb awdurdod cartref â busnes penodol. Roedd hyn yn cynnwys ffurflenni cytundeb model a manylion y ddwy blaid ar gyfer cysylltu, ynghyd â meini prawf yr oedd yn ofynnol i'r busnes gydymffurfio â nhw cyn y gellid cadarnhau'r cytundeb.
- 9.3 Roedd gan swyddogion fynediad at wefan LACORS i nodi Awdurdodau Cartref rhestredig. Roedd tystiolaeth mewn ffeiliau a archwiliwyd y rhoddid ystyriaeth ddyledus i wybodaeth a dderbyniwyd ar ôl cydgysylltu ag Awdurdodau Cartref yn ystod archwiliadau. Hefyd, canfuwyd tystiolaeth y cynigid cyngor i awdurdodau gorfodi a gysylltai â'r Gwasanaeth ynghylch materion Awdurdod Cartref.

## 10 Cyngor i Fusnesau

10.1 Yn ogystal â'r cyngor a roddid yn ystod yr arolygiadau, roedd y Gwasanaeth yn gallu dangos ymagweddau eraill a ddefnyddid i helpu busnesau gydymffurfio â'r gyfraith. Roedd y rhain yn cynnwys y canlynol:

- Ystod o daflenni cyngor swyddogol a gynhyrchwyd yn fewnol, i arlwywyr a thrinwyr bwyd, a gynhwysai faterion hylendid bwyd a safonau bwyd ill dau.
- Dosbarthu dogfen o'r enw "Nodiadau Arweiniol i'r Diwydiant Bwyd, Dadansoddiad Perygl Diogelwch Bwyd" i fusnesau bwyd yn arweiniad i weithredu system rheoli bwyd effeithiol.
- Yn ogystal â'r ddogfen a grybwyllir uchod a anelir at safleoedd cyffredinol, roedd yr Awdurdod wedi cynhyrchu arweiniad tebyg a anelwyd yn benodol at gartrefi gofal nyrsio a chartrefi preswyl, a meithrinfeydd.
- Rhaglen o ymweliadau â chigyddion lleol i'w cynorthwyo i weithredu gofynion y rheolau labelu cig eidion yn llawn.
- Seminar i ffermwyr a gweithgynhyrchwyr organig am faterion pwysu a mesur a labelu bwyd.

10.2 Nid oedd unrhyw dystiolaeth i awgrymu bod yr Awdurdod yn cynnig cyngor i fusnesau o ran bwydydd anifeiliaid.

10.3 *Argymhelliad*

Dylai'r Awdurdod:

Ehangu ei gyngor i fusnesau i gynnwys bwydydd anifeiliaid.  
[Y Safon – 10.1]

## **11 Cronfa Ddata Safleoedd Bwyd a Bwydydd Anifeiliaid**

- 11.1 Roedd gan yr Awdurdod gronfa ddata gyfrifiadurol o'r safleoedd bwyd a'r safleoedd bwydydd anifeiliaid yn ei ardal.
- 11.2 Roedd yr Awdurdod wedi sefydlu a gweithredu gweithdrefn ddogfenedig i sicrhau bod y gronfa ddata yn gywir ac yn gyfoes. Roedd gan swyddogion fynediad at y cronfeydd data a warchodwyd gan gyfrineiriau, a chaent eu hatal rhag creu neu ddileu cofnodion.
- 11.3 Archwiliwyd y gronfa ddata am 12 safle bwyd a nodwyd ar hap o rifyn cyfredol cyfeiriadur busnes. Roedd pob un o'r safleoedd hyn yn bresennol ar gronfa ddata'r Awdurdod ac wedi'u cynnwys yn y rhaglen arolygu.

## **12 Arolygu a Samplo Bwyd a Bwydydd Anifeiliaid**

- 12.1 Roedd y labordai a ddefnyddid gan yr Awdurdod wedi'u hachredu'n briodol.
- 12.2 Roedd gan yr Awdurdod bolisi samplo dogfenedig yn gynwysedig yn y Cynllun Gwasanaeth Bwyd a ymdriniai â bwyd a bwydydd anifeiliaid, ac a nodai ddiben samplo bwyd, y sylfaen ar gyfer cynhyrchu'r rhaglen samplo, a'r mathau o samplau i'w cymryd. Hefyd, roedd yr Awdurdod wedi cynhyrchu dogfen bolisi ynghylch samplo bwyd a dwr a ailadroddai'r materion hyn.
- 12.3 Amcangyfrifai'r Cynllun Gwasanaeth mai cost samplo ar gyfer safonau bwyd yn ystod 2004/2004 oedd £8,500, a £3,232 ar gyfer bwydydd anifeiliaid. Talwyd am gost dadansoddi samplau microbiolegol gan Wasanaeth Labordai Iechyd y Cyhoedd.
- 12.4 Roedd y lefelau samplo amcangyfrifedig ar gyfer 2003/2004 fel a ganlyn:
- Samplo microbiolegol 392 y flwyddyn,
  - Samplo Safonau Bwyd 163 y flwyddyn,
  - Samplo bwydydd anifeiliaid 20 y flwyddyn.
- 12.5 Roedd yr Awdurdod wedi cynhyrchu rhaglenni ar gyfer samplo safonau bwyd a samplo microbiolegol, er nad oedd y rhain yn nodi safleoedd penodol.
- 12.6 Roedd gan yr Awdurdod weithdrefnau samplo a oedd yn cynnwys samplo microbiolegol, samplo safonau bwyd a bwydydd anifeiliaid. Roedd y rhain yn unol â Chod Ymarfer perthnasol y Ddeddf Diogelwch Bwyd ac arweiniad a gyhoeddwyd yn ganolog.
- 12.7 Archwiliwyd cofnodion ffeil 10 o samplau microbiolegol anfoddhaol a 10 o samplau safonau bwyd anfoddhaol. Ymddangosai y cafwyd pob un yn unol â pholisïau, rhaglenni a gweithdrefnau samplo. Cofnodwyd pob canlyniad yn y ffeiliau priodol a rhoddwyd gwybod i'r perchnogion amdanynt. Fodd bynnag, yn achos 6 sampl microbiolegol, nid oedd tystiolaeth am unrhyw gamau dilynol o ran y safleoedd hyn.

*Argymhelliad*

12.8 Dylai'r Awdurdod:

Gymryd camau priodol yn unol â'r polisi gorfodi pan ystyrir nad yw canlyniadau samplau yn foddhaol.

[Y Safon – 12.6]

### **13 Rheoli ac Ymchwilio i Achosion a Chlefydau Heintus sy'n Ymwneud â Bwyd**

- 13.1 Roedd gan yr Awdurdod weithdrefn ddogfenedig o ran rheoli achosion o glefydau heintus sy'n ymwneud â bwyd, a luniwyd ar y cyd â'r Awdurdod Iechyd, Gwasanaeth Labordai Iechyd y Cyhoedd a sefydliadau perthnasol eraill, gan gynnwys Awdurdodau cyfagos yng Ngogledd Cymru. Rhoddwyd gwybod i'r Archwilwyr na chafwyd unrhyw achosion diweddar o glefydau heintus sy'n ymwneud â bwyd yn ardal yr Awdurdod. Nid oedd y cynllun wedi cael ei adolygu na'i brofi.
- 13.2 Paratowyd gweithdrefn, a roddai manylion am ymchwiliadau i achosion achlysurol o glefydau heintus sy'n ymwneud â bwyd, gan yr Awdurdod, a oedd yn cynnwys cyfres gynhwysfawr o nodiadau cyngor, holiaduron a llythyrau safonol.
- 13.3 Archwiliwyd cofnodion ffeil 6 rhybudd unigol o glefydau heintus sy'n ymwneud â bwyd. Nid oedd cofnodion 2 achos yn ddigon manwl i bennu a gynhaliwyd archwiliad priodol ac, yng ngweddill yr achosion, roedd y cofnodion ffeil yn anghyflawn gyda ffurflenni archwilio anghyflawn, diffyg tystiolaeth yr anfonwyd llythyrau safonol ac, mewn un achos, dryswch o ran beth oedd yr organeb achosol.

#### *Argymhellion*

13.4 Dylai'r Awdurdod:

- (i) Sicrhau y caiff y weithdrefn ar gyfer rheoli achosion o glefydau heintus sy'n ymwneud â bwyd ei hadolygu ar y cyd â'r Awdurdod Iechyd ac unrhyw sefydliadau perthnasol eraill, ac y caiff ei phrofi fel a nodwyd.  
[Y Safon – 13.1]
- (ii) Cynnal ymchwiliadau i achosion achlysurol yn gwbl unol â'r weithdrefn ddogfenedig ar gyfer archwilio rhybuddion o glefydau heintus sy'n ymwneud â bwyd.  
[Y Safon – 13.2]

## **14 Digwyddiadau Diogelwch Bwyd**

- 14.1 Roedd yr Awdurdod wedi sefydlu a gweithredu gweithdrefnau dogfenedig i ymdrin â Rhybuddion Perygl Bwyd (RhPB) a dderbyniwyd gan Asiantaeth Safonau Bwyd, a gynhwysai drefniadau cysylltu anffurfiol y tu allan i oriau gwaith.
- 14.2 Roedd system gyfrifiadurol yr Awdurdod yn gallu derbyn rhybuddion perygl bwyd ac roedd copiâu o'r holl RhPBau a gyhoeddwyd yn ystod y flwyddyn ddiwethaf ar gael. Roedd ymatebion yr Awdurdod i RhPBau yn briodol ac yn cael eu cofnodi.
- 14.3 Dywedwyd wrth yr archwilwyr na chafwyd unrhyw achosion lleoledig difrifol na phroblemau diogelwch bwyd ehangach yn ystod y ddwy flynedd diwethaf y byddai wedi bod yn ofynnol rhoi gwybod amdanynt i Asiantaeth Safonau Bwyd, yn unol â Chod Ymarfer Rhif 16 y Ddeddf Diogelwch Bwyd: Gorfodi Deddf Diogelwch Bwyd 1990 o ran y System Rhybuddio ynghylch Perygl Bwyd.

## 15 Gorfodaeth

- 15.1 Roedd yr Awdurdod wedi mabwysiadu Concordat Gorfodi awdurdod lleol.
- 15.2 Roedd yr Awdurdod wedi datblygu polisi gorfodi i'r adran Gwasanaethau Amgylcheddol a gymeradwywyd yn ffurfiol gan yr aelodau ym mis Ebrill 2003. Roedd copi caled o'r ddogfen ar gael, ac roedd ar gael ar wefan yr Awdurdod hefyd.
- 15.3 Yr unig weithgareddau gorfodi a wnaed gan yr Awdurdod yn ystod y 2 flynedd cyn yr archwiliad oedd 3 achos o ildio bwyd yn wirfoddol ac 1 rhybudd ffurfiol. Roedd yr achosion o ildio bwyd yn wirfoddol yn rhan o orfodi hylendid bwyd, ac roedd y rhybudd ffurfiol yn rhan o orfodi safonau bwyd.
- 15.4 Archwiliwyd y 3 ffeil ynghylch yr ildio gwirfoddol a chanfuwyd y gwnaed pob un yn unol ag arweiniad a gyhoeddwyd yn ganolog.
- 15.5 Proseswyd y rhybudd ffurfiol yn gwbl unol â pholisi gorfodi'r Awdurdod, Codau Ymarfer perthnasol y Ddeddf Diogelwch Bwyd ac arweiniad swyddogol.
- 15.6 Roedd gan yr Awdurdod nifer o welyau cregynbysgod yn ei ardal, yr oedd angen dogfennau symud ar eu cyfer fel arfer i alluogi cynaeafu masnachol. Nodai ddiffyg unrhyw ddogfennau o'r fath yn ystod y 12 mis blaenorol, er gwaethaf defnydd parhaus ar y gwelyau, nad oedd yr Awdurdod yn gorfodi'r ddeddfwriaeth berthnasol yn llawn.

### *Argymhelliad*

15.7 Dylai'r Awdurdod:

Sicrhau ei fod yn cyflawni'r holl weithgareddau gorfodi sy'n gysylltiedig â'r gwelyau cregynbysgod yn unol â'r ddeddfwriaeth berthnasol ac arweiniad a gyhoeddir yn ganolog.

[Y Safon – 15.2]

## **16 Cofnodion ac Adroddiadau Arolygu**

### *Hylendid Bwyd*

- 16.1 Roedd cofnodion papur a chofnodion cronfa ddata o safleoedd bwyd yn adferadwy ac wedi'u cadw am y 6 blynedd sy'n ofynnol yn ôl y Safon.
- 16.2 Archwiliwyd cofnodion ar gyfer 10 safle cyffredinol lle cynhaliwyd arolygiadau hylendid bwyd. Cynhwysai'r cofnodion fanylion am faint a graddfa'r busnes, y math o weithgarwch bwyd, gwybodaeth am hyfforddiant ar hylendid ac asesiad o gydymffurfriad y busnes â dadansoddiad o berygl. Fodd bynnag, mewn 5 o achosion, roedd y rheoliadau a ddyfynnwyd naill ai'n anghywir neu'n anghyflawn.
- 16.3 Hefyd, archwiliwyd cofnodion 5 Safle Cymeradwy. Cofnodwyd crynodeb o safleoedd a gweithgareddau ar 4 ffeil. Fodd bynnag, roedd manylion fel y labordai a ddefnyddid gan y cwmni, cynlluniau tynnu cynnyrch yn ei ôl, trefniadau difa pla, hyfforddiant ar hylendid, asesu hunanwiriadau HACCP a manylion y rhaglen lanhau a chemegau a ddefnyddid yn eisiau, yn gyson.
- 16.4 Archwiliwyd deg ffeil a oedd yn ymwneud â thrwyddedu safleoedd siopau cigyddion. Roedd y cofnodion ffeil yn gynhwysfawr eu natur, gyda disgrifiad o weithrediadau'r safleoedd, a manylion am gydymffurfio â gofynion hyfforddiant a HACCP.
- 16.5 Dosbarthwyd naill ai adroddiad am yr arolygiad neu lythyr dilynol ar ôl pob arolygiad hylendid bwyd, a nodai'r rheswm am unrhyw waith a champau gofynnol yn eglur, ac a nodai'r amserlenni priodol ar gyfer gweithredu a gwahaniaethu rhwng gofynion cyfreithiol a chyngor.
- 16.6 Yn gyffredinol, nid oedd y cofnodion ffeil am gwynion a chlefydau heintus yn ddigon cynhwysfawr i weithredu'n gofnod er gwybodaeth i swyddogion gorfodi eraill.

### *Safonau Bwyd a Bwydydd Anifeiliaid*

- 16.7 Roedd cofnodion papur a chofnodion cronfa ddata ar gyfer safleoedd bwyd a bwydydd anifeiliaid yn adferadwy ac, yn gyffredinol, fe'u cedwid am y 6 blynedd sy'n ofynnol yn ôl y Safon.
- 16.8 Gadewid ffurflenni ôl-Arolygiad yn y safle ar ôl arolygiad safonau bwyd, ac roedd cofnodion a archwiliwyd am arolygiadau diweddar, yn

gyffredinol, yn gynhwysfawr eu natur.

- 16.9 Roedd cofnodion ffeil o ran safleoedd bwydydd anifeiliaid yn gyfyngedig, heb fawr o wybodaeth am weithgareddau a wnaed ar y safleoedd. Hefyd, mewn sawl achos, nid oedd y cofnodion copi caled yn cyd-fynd â'r cofnodion cyfrifiadurol.

*Argymhelliad*

- 16.10 Dylai'r Awdurdod:

Sicrhau bod manylion cofnodion a gedwir am Safleoedd Cymeradwy, cwynion, ymchwiliadau clefydau heintus ac arolygiadau bwydydd anifeiliaid yn ddigonol i sicrhau y gellir canfod y camau a gymerwyd, ynghyd â hanes cydymffurfio ac archwilio.  
[Y Safon – 16.1]

**17 Cwynion am y Gwasanaeth**

- 17.1 Roedd gan yr Awdurdod weithdrefn gwyno gorfforaethol a oedd yn cydymffurfio'n llawn â gofynion y Safon.
- 17.2 Roedd gwybodaeth am y weithdrefn ar gael yn y manau derbyn, ac roedd taflen wybodaeth a amlinellai'r weithdrefn ar gael i'r cyhoedd.
- 17.3 Dywedwyd wrth yr archwilwyr na chofnodwyd unrhyw gwynion yn erbyn y gwasanaeth yn ystod y 2 flynedd cyn yr archwiliad.

## **18 Cysylltiad â Sefydliadau Eraill**

18.1 Roedd gan yr Awdurdod drefniadau cysylltu ag awdurdodau cyfagos a chyrff priodol eraill, gyda'r nod o hwyluso gorfodaeth a oedd yn gyson. Roedd y rhain yn cynnwys cyfranogiad gweithredol yn y canlynol:

- Grwp Bwyd Gogledd Cymru.
- Panel Technegol Diogelwch Bwyd Cymdeithas Cyfarwyddwyr Diogelu'r Cyhoedd Cymru.
- Fforwm Microbiolegol Bwyd Cymru
- Panel Mesureg a Safonau Ansawdd Gogledd Cymru .

Cedwid cofnodion y cyfarfodydd hyn, ac roeddent yn cadarnhau presenoldeb rheolaidd gan un o gynrychiolwyr y Gwasanaeth.

## 19 Monitro Mewnol

- 19.1 Yn ddiweddar, cynhyrchodd yr Awdurdod weithdrefn monitro mewnol ddogfenedig a gynhwysai'r gwasanaeth gorfodi hylendid bwyd a oedd, yn ei dro, yn cynnwys agweddau ansoddol a meintiol. Cyfeiriai'r Polisi a Gweithdrefnau Gorfodi Safonau Bwyd ac Amaethyddol at fonitro mewnol o ran gorfodi safonau bwyd a bwydydd anifeiliaid. Dylai gweithredu'r gweithdrefnau'n llawn sicrhau y caiff materion a godwyd yn ystod yr archwiliad, o ran cofnodion yn benodol, eu dileu.
- 19.2 Roedd tystiolaeth o fonitro ansoddol a meintiol anffurfiol, gan gynnwys y canlynol:
- Monitro perfformiad drwy adroddiadau mewnol ac adroddiadau pwyllgor
  - Cyfarfodydd tîm i drafod materion dehongli
  - Adolygu gohebiaeth
- 19.3 Hefyd, roedd yr Awdurdod wedi defnyddio holiaduron a anfonwyd at ddefnyddwyr gwasanaeth yn gofyn am eu barn ar ansawdd y gwasanaeth a gynigid. Darparwyd tystiolaeth am 2 arolwg, y cyntaf ynghylch hylendid bwyd a'r ail ynghylch yr adran Safonau Masnach, a gynhwysai gorfodi safonau bwyd. Nodai'r arolygon, yn gyffredinol y ceid lefel uchel o foddhad ymysg y gymuned fusnes am y gwasanaeth gorfodi bwyd a gynigid gan yr Awdurdod.

### 19.4 *Argymhelliad*

Dylai'r Awdurdod:

Weithredu ei weithdrefnau monitro mewnol yn llawn i sicrhau gorfodaeth effeithiol a chyson, ac i gadarnhau ei bod yn cydymffurfio â holl feysydd y Safon, deddfwriaeth a pholisïau a gweithdrefnau dogfenedig yr Awdurdod ei hun.

[ Y Safon 19.1 ]

## **20 Adolygiad gan Drydydd Parti neu Gydradd**

- 20.1 Roedd yr Awdurdod wedi cymryd rhan yng nghynllun archwilio rhyng-Awdurdod Cymru Gyfan Panel Technegol Diogelwch Bwyd Cymdeithas Cyfarwyddwyr Diogelu'r Cyhoedd Cymru yn 2000. Cynhyrchodd yr Awdurdod gynllun gweithredu i ymdrin â'r materion a godwyd yn ystod yr archwiliad.

## **21 Hyrwyddo Diogelwch a Safonau Bwyd a Bwydydd Anifeiliaid**

21.1 Roedd tystiolaeth o waith hyrwyddo diogelwch bwyd a wnaed gan yr Awdurdod yn cynnwys:

- Cyfranogi yn Wythnos Diogelwch Bwyd Genedlaethol Foodlink, gydag arddangosiadau mewn 4 archfarchnad leol yn ystod 2002.
- Cyfranogi yng Nghynllun Gwobrau Hylendid Bwyd Cymru
- Cyfres o gyflwyniadau ar ymwybyddiaeth o ddiogelwch bwyd yn y coleg lleol.

### *Argymhelliad*

21.2 Dylai'r Awdurdod:

Sicrhau ei fod yn ehangu ei weithgareddau hyrwyddo i gynnwys safonau bwyd a bwydydd anifeiliaid. [Y Safon – 21.1]

**Archwilwyr: Nick Wellington**

Jane Davies

Rob Wilkins

Keith Blake

Asiantaeth Safonau Bwyd Cymru

## Geirfa

Dadansoddwr Amaethyddol	Rhywun, â chanddo'r cymwysterau rhagnodedig, a benodir yn ffurfiol gan awdurdod lleol i ddadansoddi samplau bwydydd anifeiliaid.
Safleoedd cymeradwy	Safle gweithgynhyrchu bwyd a gymeradwyir gan yr awdurdod lleol, yng nghyd-destun deddfwriaeth benodol, ac y rhoddir cod adnabod unigryw iddo sy'n berthnasol mewn masnach genedlaethol a/neu ryngwladol.
Swyddog awdurdodedig	Swyddog cymwys addas a awdurdodir gan yr awdurdod lleol i weithredu ar ei ran wrth, er enghraifft, orfodi deddfwriaeth.
Gwerth Gorau *	<p>Polisi Llywodraethol â'r nod o wella perfformiad llywodraeth leol wrth ddarparu gwasanaethau i gymunedau lleol – o addysg a gofal i'r henoed, i iechyd yr amgylchedd a chynnal ffyrdd. Nod Gwerth Gorau yw sicrhau bod lefel cost ac ansawdd y gwasanaethau hyn yn dderbyniol i bobl leol trwy:</p> <ul style="list-style-type: none"><li>• gynyddu rôl pobl leol wrth benderfynu blaenoriaethau gwasanaethau llywodraeth leol</li><li>• gwella'r ffordd y mae awdurdodau'n rheoli ac yn adolygu eu busnes</li><li>• adeiladu ar brofiad ac arbenigedd staff.</li></ul> <p>* Yng Nghymru, disodlwyd hyn yn ddiweddar gan Raglen Cymru ar gyfer Gwella</p>
Arolygfeydd Ffin	Man dyfod i'r DU o wledydd y tu allan i'r UE i gynnyrch sy'n deillio o anifeiliaid.
Codau Ymarfer	Codau Ymarfer y Llywodraeth a gyhoeddir o dan Adran 40 Deddf Diogelwch Bwyd 1990 yn arweiniad i awdurdodau lleol ynghylch gorfodi deddfwriaeth bwyd.
Concordat Gorfodi	Arweiniad gan y Llywodraeth sy'n nodi egwyddorion a gweithdrefnau gorfodaeth dda y gall awdurdodau lleol eu mabwysiadu. Fe'i datblygwyd mewn ymgynghoriad â busnesau, llywodraeth leol a chanolog, grwpiau defnyddwyr a phartïon eraill

sydd â diddordeb. Mae'n nodi'r hyn y gall busnesau ac eraill sy'n cael eu rheoleiddio ei ddisgwyl gan swyddogion gorfodi.

Swyddog Iechyd yr Amgylchedd (SIA)	Swyddog a gyflogir gan yr awdurdod lleol i orfodi deddfwriaeth diogelwch bwyd.
Bwydydd Anifeiliaid	Term a ddefnyddir mewn deddfwriaeth i ddisgrifio cymysgeddau bwyd i anifeiliaid fferm ac anifeiliaid anwes.
Archwiliwr Bwyd	Person â'r cymwysterau rhagnodedig sy'n cynnal dadansoddiadau microbiolegol ar ran yr awdurdod lleol.
Rhybuddion Perygl Bwyd	Mae hwn yn system a weithredir gan Asiantaeth Safonau Bwyd i rybuddio'r cyhoedd ac awdurdodau lleol am broblemau cenedlaethol neu ranbarthol o ran diogelwch bwyd.
Hylendid bwyd	Y gofynion cyfreithiol sy'n cynnwys diogelwch ac iachusrwydd bwyd.
Safonau bwyd	Y gofynion cyfreithiol sy'n cynnwys ansawdd, cyfansoddiad, labelu, cyflwyniad a hysbysebu bwyd, a deunyddiau sy'n dod i gysylltiad â bwyd.
Cytundeb Fframwaith	<p>Mae'r Cytundeb Fframwaith yn cynnwys:</p> <ul style="list-style-type: none"><li>• Safon Gorfodi Cyfraith Fwyd</li><li>• Arweiniad ar Gynllunio Gwasanaeth</li><li>• Cynllun Monitro</li><li>• Cynllun Archwilio</li></ul> <p>Mae'r <b>Safon</b> a'r <b>Arweiniad ar Gynllunio Gwasanaeth</b> yn nodi disgwyliadau'r Asiantaeth ynghylch cynllunio a darparu gorfodaeth cyfraith fwyd.</p> <p>Mae'r <b>Cynllun Monitro</b> yn ei wneud yn ofynnol i awdurdodau lleol gyflwyno ffurflenni chwarterol i'r Asiantaeth am eu gweithgareddau gorfodi bwyd h.y. nifer yr arolygiadau, samplau ac erlyniadau.</p> <p>O dan y <b>Cynllun Archwilio</b> bydd Asiantaeth Safonau Bwyd yn archwilio gwasanaethau gorfodi cyfraith fwyd awdurdodau lleol yn ôl y meini prawf a</p>

nodwyd yn y Safon.

Ffigur Cyfwerth ag  
Amser Llawn (FTE)

Ffigur sy'n cynrychioli'r rhan hwnnw o amser swyddog unigol sydd ar gael ar gyfer swyddogaeth neu gyfres o ddyletswyddau penodol. Mae'n adlewyrchu'r ffaith y gall unigolion fod yn gweithio'n rhan amser, neu y gall fod ganddynt gyfrifoldebau eraill yn y sefydliad nad ydynt yn gysylltiedig â gorfodaeth fwyd.

HACCP

Pwynt Rheoli Critigol ar gyfer Dadansoddi Peryglon – system rheoli diogelwch bwyd a ddefnyddir mewn busnesau bwyd i nodi pwyntiau yn y broses gynhyrchu lle mae'n hanfodol i ddiogelwch bwyd y cynhelir y mesur rheoli yn gywir, a thrwy hynny ddileu neu leihau'r perygl i lefel sy'n ddiogel.

Awdurdod Cartref

Awdurdod lle ceir sylfaen benderfynu berthnasol menter, ac sydd wedi cymryd cyfrifoldeb am gynghori'r busnes hwnnw ynghylch materion yn ymwneud â diogelwch bwyd/safonau bwyd. Mae'n gweithredu fel y pwynt cyswllt canolog ar gyfer ymholiadau awdurdodau gorfodi eraill, o ran polisiau a gweithdrefnau'r cwmni hwnnw sy'n gysylltiedig â bwyd.

Rhybudd Gwella

Rhybudd a gyflwynir gan Swyddog Awdurdodedig yr awdurdod lleol o dan Adran 10 Deddf Diogelwch Bwyd 1990, sy'n ei gwneud yn ofynnol i berchennog busnes bwyd wneud gwaith addas i sicrhau bod y busnes yn cydymffurfio â gofynion deddfwriaeth hylendid bwyd neu brosesu bwyd.

Archwilio Rhyng-  
Awdurdod

System lle gall awdurdodau lleol archwilio gwasanaethau gorfodi cyfraith fwyd ei gilydd yn erbyn safon ansawdd a gytunwyd.

Fforwm aelodau

Fforwm awdurdod lleol lle mae Aelodau'r Cyngor yn trafod ac yn penderfynu ar wasanaethau gorfodi cyfraith fwyd.

Ffurflenni CSRhB

Ffurflenni am weithgareddau gorfodi cyfraith fwyd lleol y mae'n ofynnol eu dychwelyd i'r Undeb Ewropeaidd o dan y Gyfarwyddeb Swyddogol Rheoli Bwydydd.

Awdurdod Gwreiddiol	Awdurdod y mae busnes, yn ardal yr Awdurdod hwnnw, yn cynhyrchu neu'n pecynnu nwyddau neu wasanaethu ac y mae'r Awdurdod yn gweithredu yn bwynt cyswllt canolog iddo o ran ymholiadau gan awdurdodau gorfodi eraill am y cynhyrchion hynny.
Graddio risg	System sy'n graddio safleoedd bwyd yn ôl y risg ac yn pennu pa mor aml y dylid arolygu'r safleoedd hynny. Er enghraifft, dylid arolygu safleoedd hylendid bwyd uchel eu risg, o leiaf unwaith bob 6 mis.
Cynllun Gwasanaeth	Dogfen a gynhyrchir gan awdurdod lleol sy'n nodi ei gynlluniau ynghylch darparu a chyflwyno gwasanaeth bwyd i'r gymuned leol.
Safonau Masnach	Yr Adran o fewn awdurdod lleol sydd, ymysg cyfrifoldebau eraill, yn gorfodi deddfwriaeth safonau bwyd a bwydydd anifeiliaid.
Swyddog Safonau Masnach (SSM)	Swyddog a gyflogir gan yr awdurdod lleol sydd, ymysg cyfrifoldebau eraill, yn gallu gorfodi deddfwriaeth safonau bwyd a bwydydd anifeiliaid.
Awdurdod Unedol	Awdurdod lleol lle cyfunir yr holl swyddogaethau, er enghraifft Awdurdodau Cymreig a Bwrdeistrefi yn Llundain. Bydd cyfrifoldebau Awdurdod Unedol yn cynnwys gorfodaeth hylendid bwyd, safonau bwyd a bwydydd anifeiliaid.

**Cynllun Gweithredu ar gyfer: Cyngor Sir Ynys Môn**

Dyddiad Archwilio: 3 – 5 Mehefin 2003

GWELLIANNAU A GYNLLUNNIR	ERBYN (DYDDIAD)	I FYND I'R AFAEL A (ARGYMHELLIAD, GAN GYNNWYS PARAGRAFF SAFONOL)	SYLWADAU
<p>Cynllun Gwasanaeth Bwyd i'w gyflwyno i'w gymeradwyo gan yr Aelodau</p> <p>Adolygiad o Berfformiad Blynyddol i'w gyflwyno i'w gymeradwyo gan yr Aelodau</p>	<p>Wedi'i gwblhau</p> <p>Wedi'i gwblhau</p>	<p>3.8 Dylai'r Awdurdod:</p> <p>(i) Gyflwyno'r Cynllun Gwasanaeth i'w gymeradwyo gan yr Aelodau [Y Safon – 3.1]</p> <p>(ii) Cynnal a dogfennu adolygiad perfformiad blynyddol ar sail Cynllun Gwasanaeth pob blwyddyn, adrodd am yr adolygiad i'r fforwm aelodau priodol ac ymdrin ag unrhyw ddiffygion yn y trefniadau gwasanaeth ar gyfer y flwyddyn ganlynol. [Y Safon – 3.2]</p>	<p>Cymeradwywyd y Cynllun Gwasanaeth Bwyd gan yr Aelodau Gweithredol ar 27 Mai 2003</p> <p>Yr adolygiad nesaf o berfformiad i'w gynnal erbyn 30 Ebrill 2006</p>
<p>Gweithredu'r Weithdrefn Rheoli ac Adolygu Dogfennau Safonau Masnach</p> <p>Caiff Systemau Rheoli</p>	<p>Wedi'i gwblhau</p> <p>31/12/05</p>	<p>4.3 Dylai'r Awdurdod:</p> <p>(i) Ddatblygu a gweithredu'r system reoli ymhellach i sicrhau y caiff yr holl bolisiâu a gweithdrefnau dogfenedig o ran gorfodi cyfraith fwyd eu hadolygu yn rheolaidd, a phryd bynnag y ceir newidiadau i ddeddfwriaeth neu arweiniad a gyhoeddir yn ganolog. [Y Safon – 4.1]</p> <p>(ii) Sicrhau y caiff yr holl ddogfennaeth o ran</p>	<p>System Rheoli Dogfennau Safonau Masnach yn weithredol ers 1 Ebrill 2004 ac yn cael ei adolygu'n rheolaidd.</p>

<p>Dogfennau eu hadolygu i sicrhau y caiff dogfennau a ddisodlwyd gan rai diweddarach eu gwaredu neu nodi'n glir eu bod wedi'u disodli.</p>		<p>ei weithgarwch gorfodi ei chynnwys yn y system reoli ac y caiff unrhyw newidiadau i'r ddogfennaeth eu hawdurdodi'n briodol, ac y gwaredir unrhyw ddogfennau a ddisodlwyd neu nodi'n glir eu bod wedi'u disodli gan ddogfennaeth ddiweddaredig [Y Safon – 4.2]</p>	
<p>Adolygu anghenion hyfforddiant yr holl staff a awdurdodir i gynnal dyletswyddau awdurdodi bwyd</p> <p>Adolygu a diweddarau cofnodion cyrsiau hyfforddiant a gedwir ar system Rheoli Personél gyfrifiadurol AD gorfforaethol.</p> <p>Adolygu a diweddarau cofnodion cymwysterau a hyfforddiant staff a gedwir ar system Rheoli Personél gyfrifiadurol AD gorfforaethol.</p>	<p>31/01/06</p> <p>31/03/06</p> <p>31/03/06</p>	<p>5.8 Dylai'r Awdurdod:</p> <p>(i) Sicrhau bod gan yr holl staff a awdurdodwyd i gyflawni dyletswyddau gorfodi bwyd yr hyfforddiant priodol a'r profiad addas. [Y Safon – 5.3]</p> <p>(ii) Cofnodi cynnwys, amcanion, parhad ac unrhyw asesiad a wnaed o gyrsiau hyfforddi a fynychwyd gan staff gorfodi bwyd. [Y Safon – 5.4]</p> <p>(iii) Cofnodi cymwysterau academaidd neu gymwysterau perthnasol eraill a hyfforddiant y staff gorfodi bwyd. [Y Safon – 5.5]</p>	<p>Mae Cynlluniau Hyfforddi, a gyflwynir i'r Adran Adnoddau Dynol yn flynyddol, yn nodi anghenion hyfforddi'r holl staff, gan gynnwys staff a awdurdodwyd i orfodi cyfraith fwyd.</p> <p>Cedwir cofnodion hyfforddiant ar system gyfrifiadurol Rheolwr Personél gan yr Adran Adnoddau Dynol gorfforaethol. Ar hyn o bryd, rhoddir mynediad at system fyw i adrannau i ddibenion bwydo data i mewn ac adrodd.</p>
<p>Adolygu a gweithredu gweithdrefn ddogfenedig</p>	<p>30/09/05</p>	<p>6.4 Dylai'r Awdurdod:</p> <p>Adolygu a gweithredu'r weithdrefn ddogfenedig ar gyfer calibro i sicrhau y caiff</p>	<p>Y weithdrefn adolygedig i gynnwys manylion am derfynau goddefiant</p>

ar gyfer calibro, yn unol â'r Cod Ymarfer.		yr holl offer mesur tymheredd eu calibro a'u gwirio yn gwbl unol â Chod Ymarfer Rhif 10 y Ddeddf Diogelwch Bwyd: Gorfodi Gofynion Rheoli Tymheredd y Rheoliadau Hylendid Bwyd. [Y Safon – 6.2}	derbyniol i'r offer, amllder gwiriadau, camau i'w cymryd lle bydd canlyniadau y tu allan i derfynau goddefiant, a gwiriadau arferol a wneir gan swyddogion rhwng gwiriadau calibro'r gweithgynhyrchwr.
<p>Adolygu rhaglen arolygiadau Hylendid Bwyd er mwyn sicrhau cydymffurfiaid â'r amllder sylfaenol yn y Cod Ymarfer.</p> <p>Adolygu gweithdrefnau ynghylch Safleoedd Cymeradwy.</p> <p>Adolygu'r Weithdrefn Arolygu Hylendid Bwyd a gweithredu'r gwelliannau gofynnol.</p>	<p>Wedi'i gwblhau</p> <p>31/03/06</p> <p>31/03/06</p>	<p>7.9 Dylai'r Awdurdod:</p> <p>(i) Sicrhau y cynhelir arolygiadau hylendid bwyd yn ôl yr amllder sylfaenol sy'n ofynnol o dan God Ymarfer Rhif 9 y Ddeddf Diogelwch Bwyd: Arolygiadau Hylendid Bwyd. [Y Safon – 7.1]</p> <p>(ii) Sicrhau y cynhelir y broses gymeradwyo a'r arolygiadau ar Safleoedd Cymeradwy yn gwbl unol â'r ddeddfwriaeth berthnasol a'r arweiniad swyddogol. Dylai hyn gynnwys adolygiad o gymeradwyaethau sy'n bodoli eisoes. [Y Safon – 7.2]</p> <p>(iii) Adolygu'r weithdrefn arolygu ddogfenedig bresennol i gyfeirio'n fwy penodol at Safleoedd Cymeradwy ac i gynnwys arolygiadau trwyddedu cigyddion. [Y Safon – 7.5]</p>	<p>Cyflawnodd y rhaglen arolygu 100% o'r arolygiadau Categori ABC a oedd i'w cynnal yn 2004/05.</p> <p>Cynllunio ymweliadau ychwanegol i safleoedd cymeradwy, fel a gyfarwyddwyd gan y Cod Ymarfer.</p> <p>Cod Ymarfer newydd wedi'i gyhoeddi ers yr Archwiliad.</p> <p>Gall y bydd atal trwyddedu cigyddion tua mis Ionawr 2006. Rhaid adolygu'r ddogfennaeth i amlygu deddfwriaeth newydd sydd i fod i ddod ym mis Ionawr.</p>
Cais referniw am adnoddau		7.15 Dylai'r Awdurdod:	Cyflwynwyd ceisiadau referniw am

staffio ychwanegol i'w gyflwyno fel rhan o gylch gosod cyllideb referniw 2006-07.	01/12/05	Sicrhau y cynhelir arolygiadau safonau bwyd yn ôl yr amlder sylfaenol sy'n ofynnol gan God Ymarfer Rhif 8 y Ddeddf Diogelwch Bwyd: Arolygiadau Safonau Bwyd. [Y Safon – 7.1]	adnoddau staffio Safonau Masnach ychwanegol i wella lefelau arolygu safonau bwyd yn ystod cylchoedd gosod cyllideb referniw flynyddol 2004-05 a 2005-06, ond buont yn aflwyddiannus.
Diwygio Gweithdrefn Cwyno am Fwyd lechyd yr Amgylchedd a gweithredu gwelliannau.	Wedi'i gwblhau	8.5 Dylai'r Awdurdod:  Sicrhau y cymerir camau priodol o ran cwynion a dderbynnir, yn unol â'r arweiniad a gyhoeddir yn ganolog a gweithdrefnau'r Awdurdod ei hun. [Y Safon – 8.2]	Anfonwyd llythyr at achwynydd ar ôl cwblhau ymchwiliad, i roi gwybod am gamau a gymerwyd a chanlyniad yr ymchwiliad. Diwygiwyd y ffurflen Cwyno am Fwyd i gynnwys dyddiad cwblhau a manylion y cysylltu â'r achwynydd.
Estyn Cyngor i Fusnesau i gynnwys bwydydd anifeiliaid.	Wedi'i gwblhau	10.3 Dylai'r Awdurdod:  Ehangu ei gyngor i fusnesau i gynnwys bwydydd anifeiliaid. [Y Safon – 10.1]	Cwblhawyd pecynnau Cyngor i Fusnesau ar 1 Ebrill 2004 ac erbyn hyn maent yn cynnwys cyngor i werthwyr bwydydd anifeiliaid.
Diwygio Polisi a Gweithdrefn Samplo dogfenedig lechyd yr Amgylchedd.	Wedi'i gwblhau	12.8 Dylai'r Awdurdod:  Gymryd camau priodol yn unol â'r polisi gorfodi pan ystyrir nad yw canlyniadau samplau yn foddhaol. [Y Safon – 12.6]	Mae Polisi a Gweithdrefn Samplo diwygiedig yn egluro pa gamau dilynol y dylid eu cymryd, gan gynnwys ailsamplo ac ymweliadau ymchwilio â safleoedd a samplwyd.
Adolygu'r weithdrefn	31/12/05	13.4 Dylai'r Awdurdod :  (i) Sicrhau y caiff y weithdrefn ar gyfer rheoli	Mae'r Awdurdod lechyd newydd

<p>ddogfenedig, ar y cyd â'r Awdurdod Iechyd Lleol.</p> <p>Gweithredu'r weithdrefn ddogfenedig yn llawn.</p>	<p>Wedi'i gwblhau</p>	<p>achosion o glefydau heintus sy'n ymwneud â bwyd ei hadolygu ar y cyd â'r Awdurdod Iechyd ac unrhyw sefydliadau perthnasol eraill, ac y caiff ei phrofi fel a nodwyd. [Y Safon – 13.1]</p> <p>(ii) Cynnal ymchwiliadau i achosion achlysurol yn gwbl unol â'r weithdrefn ddogfenedig ar gyfer archwilio rhybuddion o glefydau heintus sy'n ymwneud â bwyd. [Y Safon – 13.2]</p>	<p>gyhoeddi canllawiau newydd ynghylch gweithdrefn ar gyfer heintiadau gastroberfeddol.</p> <p>Erbyn hyn, mae cofnodion achos yn cynnig manylion llawn yr holl gamau a gymerwyd yn ystod yr ymchwiliad, yn unol â'r weithdrefn ddogfenedig.</p>
<p>Adolygu Gweithgareddau Gorfodi o ran gwelyau cregynbysgod.</p>	<p>31/03/06</p>	<p>15.7 Dylai'r Awdurdod:</p> <p>(ii) Sicrhau ei fod yn cyflawni'r holl weithgareddau gorfodi sy'n gysylltiedig â'r gwelyau cregynbysgod yn unol â'r ddeddfwriaeth berthnasol ac arweiniad a gyhoeddir yn ganolog. [Y Safon – 15.2]</p>	<p>Materion parhaus o ran y ddeddfwriaeth berthnasol ynghylch gwelyau cregynbysgod a lefel yr adnoddau staff sy'n ofynnol i'w gorfodi'n ddigonol.</p>
<p>Adolygu manylion Cofnodion a gedwir am Safleoedd Cymeradwy, cwynion, ymchwiliadau i glefydau heintus ac arolygiadau bwydydd anifeiliaid.</p>	<p>Wedi'i gwblhau</p>	<p>16.10 Dylai'r Awdurdod:</p> <p>Sicrhau bod manylion cofnodion a gedwir am Safleoedd Cymeradwy, cwynion, ymchwiliadau i glefydau heintus ac arolygiadau bwydydd anifeiliaid yn ddigonol i sicrhau y gellir canfod y camau a gymerwyd, ynghyd â hanes cydymffurfio ac archwilio. [Y Safon – 16.1]</p>	
		<p>19.4 Dylai'r Awdurdod:</p>	

<p>Gweithredu Gweithdrefnau Monitro Mewnol yn llawn.</p>	<p>Wedi'i gwblhau</p>	<p>Weithredu ei weithdrefnau monitro mewnol yn llawn i sicrhau gorfodaeth effeithiol a chyson, ac i gadarnhau ei bod yn cydymffurfio â holl feysydd y Safon, deddfwriaeth a pholisïau a gweithdrefnau dogfenedig yr Awdurdod ei hun [Y Safon – 19.1]</p>	
<p>Ehangu gweithgareddau hyrwyddo Diogelwch Bwyd i gynnwys safonau bwyd a bwydydd anifeiliaid</p>	<p>Wedi'i gwblhau</p>	<p>21.2 Dylai'r Awdurdod:  Sicrhau ei fod yn ehangu ei weithgareddau hyrwyddo i gynnwys safonau bwyd a bwydydd anifeiliaid. [Y Safon – 21.1]</p>	<p>Ehangwyd gweithgareddau hyrwyddo ar 1 Ebrill 2004 i gynnwys safonau bwyd a bwydydd anifeiliaid.</p>